

興拒逆者災不除也
右是學者得失訣

太平經卷之七十

太平經卷之七十一

真道九首得失文訣第一百七

真人再拜請問一事然言之今天師為太平之氣出授道德以興無上之皇上有好道德之君乃下及愚賤小民其為恩起洞於六合洽於八極無不包裹今賢得師文學之及其思慮為道上以何為竟下以何為極乎善哉真人之問一何微要也其欲聞洞極知神靈進退邪實愚蔽暗事者不及唯天明師錄示之諸道有九度分別異字也今將為真人具陳其意自隨而記之勿使有所失也唯唯然一事名為元氣無為二為凝靖虛無三為數度分別可見四為神游出去而還反五為大道神與四時五行相類六為刺喜七為社謀八為洋神九為家先一事者各分為九九八十一首殊端異文密用之則共為一大根以神為使以人為戶門今為子條訣之亦不可勝豫其記自思其意其上三九二十七者可以度世其中三九二十七者可使真神吏其下三九二十七者其道多耶其神精

不可常使也令人惚惚恍恍其中時有不精之人多失妄語若失氣者也今愚生見師言眩冥不知東西顧分別為下愚生說之然其上第一元氣無為者念其身也無一為也但思其身洞白若委氣而無形常以是為法已成則無不為無不知也故人無道之時但人耳得道則變易成神仙而神上天隨天變化即是其無不為也其二為虛無自然者守形洞虛自然無有奇也身中照白上下若玉無有瑕也為之積久久亦度世之術也此次元氣無為象也三為數度者積精還自視也數頭髮下至足五指分別形容身外內莫不畢數知其意當常以是為念不失鍊分此亦小度世之術也次虛無也四為神游出去者思念五藏之神盡出入見其行游可與語言也念隨神往來亦洞見身耳此者知其吉凶次數度也五為大道神者人神出延與五行四時相類青赤白黃黑俱同藏神出入往來四時五行神吏為人使名為具道可降諸邪也六為刺喜者以刺繫地道神各亦自有典以

其家法祠神來游半以類真半似邪頗使人好巧不可常使也久久愁人七為社謀者天地四時社稷山川祭祀神下人也使人恍惚欲妄言其神暴仇狂邪不可妄為也八為洋神者言其神洋洋其道無可繫屬天下精氣

下人也使人妄言半類真半類邪九為家先家先者純見鬼無有真道也其有召呼者純死人之鬼來也此最道之下極也名為下士也得上道者能并使其下道者不能使其上也今願聞何故有是上下乎哉然此者人行之所致也守本者得上好身神出入游者得中也愚人施損其本守末他游神者得下守本者能盡見之守中者半見之守末者不能遂自鏡見之道也故凡學者須得明師不得明師失路矣故師師相傳延堅於金石不以師傳之名為妄作則致凶邪矣真人慎之慎之唯唯故古者上學聖賢得明師名為更生不得明師者名為亂經故賢聖皆事師廼能成無有師道不而獨自生也善哉善哉真人欲知其效比若夫人居大賢之里

則使人大賢居中賢之里則使人中賢居不肖之里則使人不肖常不及此之謂也學此道者審之詳之此天之要道也慎之慎之唯唯行去道歸其人以付賢明唯唯是神訣要道也

右真道九首得失文訣

致善除邪令人受道戒文第一百八真人問神人曰受道以何為戒乎神人言道乃有大戒不可不慎之也夫且得道臨且成之時乃與諸神交結也與精神為隣里出入相見觀與人相愛若父子也夫道乃重事也或悔與人且欲奪人道故先試人視人堅不共來欺人使人妄語得其辭語堅閉之慎無傳之也即可得壽也久可得真道矣傳之日消亡矣又使人好生而惡害真人曰願聞其日消亡意精神消亡身即死矣夫虛無絕洞之道常欲使人好生而惡殺閉口無泄廼可萬萬歲也真人問神人願聞無泄之禁忌神人言然大人泄之亡其位中人泄之即斷其氣小人泄之滅其世類也所以然者夫天地

乃以此自殊異自私故能神尤重之也夫天地不深知絕洞之道以何為神乎以何為壽乎記之吾告子其精之重之慎之真人唯唯不敢妄言也真人稽首願更聞其將欲欺人奈何乎哉神人言然於人心中有惡意使大邪來欺人能堅閉耳不聽其辭語則吉矣聽其辭則凶害矣夫人君聽之惡其臣言其臣不忠信而欲反也臣子聽之惡其君就來欺之言子今當為聖人今當為人君小人聽之使人自言且大尊也父聽之惡其子子聽之惡其父辨變其辭語使惑人心意言其且善且惡亂人政治一喜一怒大佞之邪也方欲害人也從古到今諸學長壽者皆不得度於此辭也真人問曰當奈何哉神人言閉耳無聽閉口無語此但佞邪無可聽者也聽之即真道去去即死矣子欲長存慎之此辭也吾已為子先更之幾何中於此大邪矣吾常自正吾心不復用之也此大邪常積欲觀人堅不大猶邪常或乃來入人之腹中動人之心使人心妄為故也時時怒喜不能自禁止皆

為邪所誤也為邪所推眾深得滅亡於此者積眾多審得其重戒心亦不可移也非獨學道者也百姓喜怒無常向是子可為也子慎之自精真人唯唯真人曰吾身嘗中於大邪使吾欲走言吾欲當為人主後當飛仙上天吾受其言信之大喜後反三月病癩疾見神人天師言心中大悅喜吾親嘗中如此矣幾為劇病後癩疾自止得愈遂得數千歲今自幸復與神人相親重復道戒觀見門戶冀得長度為天上之吏神人言子持心志堅如此何憂不得上九天周歷二十五天乎哉今是諸得上天之士皆得持心堅密不可誤者也諸可禁感誤者皆反蚤死不得度也欲得長壽讀此文以為重戒此乃死生之戒不可不慎也是故古者聖賢先得度世者不聆此之力也學道而反不得長度者皆坐聆此得其賊也夫天上大神非賊人可為便使人還此害尅故無大福也當生及死轉為天賊也今吾所教示真人書悉皆可得大壽矣或得度世但謹自持無以此為害審能專心可得

萬萬歲真人唯唯吾不敢為非請受明戒神人言子好道如此成事得上天之階矣真人聞戒獨有此邪復有深者邪復有上天之戒固固戒人耳專戒以言共欺人言人且尊貴以是戒人故使人觸防禁得誅死焉復數試人以玉女使人與其共遊已者共笑人賤還反害人之軀但人常默驚無可聆但獨自守終命何有害哉死生之間專此也真人唯唯真人問何故專使邪神來試人乎神人言道重難與人也其執必堅死而已者亦不奪人之願也天上度世之士皆不貪尊貴也但樂活而已者亦無有奇道也記吾戒子口矣吾言萬世不可忘也正使上行窮周無管之天其戒皆如此矣無復有奇哉也真人唯唯不敢離繩墨之間也神人言審如子言已得道矣言者日進邪者上休矣持心若此成神戒矣成事乘雲駕龍周流八極矣大道坦坦已得矣命已長壽無極矣真人曰唯唯神人言道實大無內外但常恐為大邪所害而不聽一邪邪於何敢爭故古者帝王好道而

學不聽邪者盡得萬萬歲其聽用邪言者悉自敗矣吾道延萬端悉當知其利害真人唯唯今得神人之辭皆得須臾長生乎神人言不深戒成事口凶矣道不得成也真人言吾生有緣命亦僥倖也延得與神人相遭逢神人言然六人生各自有命一為神人二為真人三為仙人四為道人五為聖人六為賢人此皆助天治也神人主天真人主地仙人主風而道人主教化吉凶聖人主治百姓賢人輔助聖人理萬民錄也給助六合之不足也故人生各有命也命貴不能為賤命賤不能為貴也子欲知其審實若魚雖乘水而不因水氣而蜚龍亦乘水因水氣而上青雲為天使乎貴賤實有命愚者而妄語古者聖人帝王其大優者不復錄問僞言也知其口會無可能為也此比若教無道之人令卒蜚安而蜚乎哉能飛者獨得道仙人耳夫百姓相與遊戲言我能蜚實不能蜚此妄言者若此矣真人言善哉吾一覺於此神人言子自若愚為天命可強得也哉真人言然此道亦

可學耶神人言然有天命者可學之必得大度中賢學之亦可得大壽下愚為之可得小壽子欲知其效同若凡人學耳大賢學可得大官中賢學者可得中官愚人學者可得小吏夫小吏使於白衣之民乎以是言之猶當勉學耳真人唯唯吾為之未嘗敢懈也神人言然努力信道天地之間各取可宜亦無妄也真人唯唯請得尊天重地敬上愛下順用四時五行可為不敢為非也神人言善哉善哉子得道意矣吾不復重教示子矣

右致善除邪令人受道戒文

太平經卷之七十一

太平經卷之七十二原缺七十三至八十五 傳七
齋戒思神救死訣第一百九
六方真文悉再拜問前得天師言太平氣垂到調和陰陽者一在和精神靈歸俱分處深惟天師之語使能反明洞照者一一而見之其人積衆多何以能致此諸道士能洞反光者能聚之手噫大善哉天上皇氣且至帝王當垂拱而無憂故天道諸真人來具問至道要可以為大道德明君悉除先王之流災承負天地之間邪惡氣鬼物凶毒尸咎殃為害者耶故真人來一一口問此至道要也諸弟子亦寧自知不乎忽然不自知也今忽不自知何故問之歸思天師教勅有不解者今不自知當皆以何能聚此諸絕洞虛靖反光能見邪者惟之今故相與俱來共問之也善哉真人精益進乃知疑此天使子來悉為德君具問可解邪者語方今為真人具說分別道其要意安坐共記唯唯唯天地自有神寶悉自有神精光隨五行為色隨四時之氣興衰為天地使以成人民萬物也夫天地陰陽之間

莫不被其德化而生焉得其意者立可觀不得其大要意無門戶知能大開通用者大吉可除天地之間人所病苦邪惡之屬不知其大法者神亦不可得妄空致妄得空使也願聞其意使可為萬世傳而不妄善哉子之問也然欲候得其術自有大法四時五行之氣來入人腹中為人五藏精神其色與天地四時色相應也畫之為人使其三合其王氣色者蓋其外相氣色次之微氣最居其內使其領袖見之先齋戒居間善靖處思之念之作其人畫像長短自在五人者共居五尺素上為之使其好善男思男女思女其畫像如此矣此者書已衆多非一通也自上下議其文意而為之以文書傳相微明也吾書雖多自有大分書以類相聚從字以相明則畢得其要意唯唯此四時五行精神入為人五藏神出為四時五行精神其近人者名為五德之神與人藏神相似其遠人者名為陽歷字為四時兵馬可以拱邪亦隨四時氣衰盛而行其法為其具畫像人亦三重衣王氣居外相